



Augos 12, 2024

## **Avatik Kimiggutaunna Kinugautigijaujumut Nutâk Nainimi Mipvik**

Tâna Nunatsiavut kavamanga pivalliaavut ilinganiKajumut avatimmik Kimiggutaunna ilingajumut Nutâmut Nainimi Mipvisaup Suliagijaujumut. Malitluni nânningani pigiannimit Kaujimatitsigalaniaammata tapvani ukiumi, tâna Nunatsiavut kavamanga uKautigiKattasimajanga suliatsamik avatimmut Kimiggutet katimajinginnik ammalu tilitsilauttut nutânik iligengujunik taipsumunga Kimiggutaujumut.

Ilagiallugu tainna katimajet itsivautanga, Nunanut ammalu Piviannatunut Ministerik Terry Vincent, asigiallailu iliget ilautitsivuk UKausiliginimmut, Ilukkusiliginimmut ammalu Niuggutuliginimmut Minister David Dicker, Nain AngajukKâk Joe Dicker, ammalu Duane Metcalfe kiggatuttigijauullutik Nainimi pinasuattinut/katitsuijinnut.

Isumagillugit taikkununga ministeret pikKujaliangit sâmotaulauttumut katimapviligijinnut ammalu sakKititaulauttunut Kaujimatitsigalaniaammata, taikkua katimajet Kaujitsialauttut taikkua Kinugautiliuttut sakKititsigialeit Kaujigatsagiellanik pitjutigillugu suliatsamut, nigugijunut attuilâttunut ammalu ikilliumittitaugajakKotunut, taikkutigona Avatimmut Attuigajattunut UKausigijausimajunut.

Tamannaugaluatluni, taikkua katimajet suliaKanialekkut asiangutitausomik malittaugiaKajunut ilinganiKajumut Avatimmik AttuigajakKotunut UKausigijausimajunut allajumik Kaujigatsanik taikkua KinugautiKajuit sakKititsigialeit taikkua katimajet ammalu Nunatsiavummiut Kaujimatsiatillugit kajusiutitiusonguniammata pitjutigillugu suliatsamut.

Asiangutitausok taikkununga malittaugiaKajunut tusagatsaliuttaugialet ammalu tunijauullutik inulimânut uKausigijaugumajunut sivungagut pijagettaulaigijaukkâgani.

Kaujigatsatâgiallagumaguvit pitjutigillugu suliatsamut upvalu Kimiggutausimajumut, napvâgajakKusi suliatsak Kanuilingajutsaumangât ammalu naillititausimajumik Kallunâtitut ammalu Inuktitut iluani Nunatsiavut avatik Kimiggutaunna atikâpvinganut, ilagillugit allaKutet allatausimajunut uKausigijausimajunut ammalu katimajet kajusiutigisimajanganik. Tainna atikâpvik atuinnauvuk tapvani tugaugutingani <http://bit.ly/Nain-Airport>

Kaujigatsait iningit, nenittausimavut atjiliuttautlutillu allaKutet atuinnaulâttut âkKisuttaumijut atunik Labrador Inuit nunagijanginni. Ikajuttigejunullu Kagitaujatigut tugaugutik âkKisuttausimammijuk KaujisapviKagiamut taikkununga katimattiujujut: [reviewcommittee-newnainairport@nunatsiavut.com](mailto:reviewcommittee-newnainairport@nunatsiavut.com)

Inulimânut uKausigigumajangit ullusangit ilingajumut asiangutitausomut Avatimmik Kimiggutaunitsanga UKausigijaugumajunut suli suliagijaulungituk, uKausigijaugumajut pitâgijausimajut Kangatuinnak suli isumagijaulangavut Kimiggutaugiamut, ammalu taikkua pitâgijausimajut allatausimatillugit nivingattitaulangavut ilinganiKajumut avatik Kimiggutauninga atiKapvinganut.

Sivukkatigijaujuk taikkununga Nunatsiavut kavamakkunut, tainna suliatsak ilautitsivuk sanajaunitsanga nutâmut nalunaikkutalik mipvik ininganoniattumut sakKijâgettumut mipvimik Nainimut ilingajumut ammalu akKutitsak atuttaulâtumut. Tainna Kinugautigijaujuk nutâk mipvisak iniKagajattuk siKingani kangiani nunalimmit, akungani Kauk konganit ammalu Tasialummit. Aulataugajattuk 24 sitontinik ullotillugu, sepanik ullunik wogimi.

**katimajet Kaujisapvinga:**

[reviewcommittee-newnainairport@nunatsiavut.com](mailto:reviewcommittee-newnainairport@nunatsiavut.com)

**Kinugautiliusimajut Kaujisapvinga:**

Colin Gilbride, P.Eng.

Aulatsijik Tungavigiallanut ammalu Pannaigutuliuttik, Nunatsiavut kavamanga

Tugâgutik: P.O. Box 92, Makkovik, NL A0P 1J0

Phonnik: SuliaKapvik (709) 923-2007 Aulautikulukkut (709) 899-0935

Kagitaujakkut tugaugutinga: [colin.gilbride@nunatsiavut.com](mailto:colin.gilbride@nunatsiavut.com)